



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma : f Tir Yimyim

Instagram: tiryimyim@aolima

YouTube: tir yimyim

TAPAK 8



Poland PM-i Zelensky dang Poland nunger mezüngmeshi masütsü ashi

Wang Xiyu-i Guangzhou WTA title benogo



VOL. XX NO. 343 (ADOK 343) DIMAPUR AMUNGNÜ (SUNDAY) RONGJUI (SEPTEMBER) 24, 2023 ₹ 5.00

Ita 5 lir Manipur nung mobile internet services lapokogo

Imphal, September 23, 2023 (Agencies): Manipur nung ita pungu jungnüa mobile internet services shibanga aliba Honibarnü lapoktsüogo.

Chief Minister N. Biren Singh-i osangbener senden ka nung internet shibanga aliba lapoktsüba osang metetdaksü.

“May 3 nü kin o kin tsüingda rara adokba sülen Manipur sorkari kümdanga alitsü tangatetba nung internet noktanga liasü saka tanü Honibar nungi lapoktsüogo” ta CM Biren-i ashi.

May 3 nü Kuki aser Meitei nunger tsüingda rara tenzükdak Churachandpur district nung Airtel-i internet services leak asüba onük atema CM Biren-i “iba ya shitak lir aser Airtel nung mapa inyaker ana mapa nungi anentsüogo” ta ashi.

Airtel-i iba tatalokba atema tatok meshiogo aser Manipur sorkar dang tarutsü nung ibala tatalokba malitsü atema inyaksü nangzükogo ta paisa shisem.

Manipur CM-isa nübertem dang taila osang nungi kümdangtsü ayongzük.

Nagaland nungi tetsür NCC band-i Republic Day 2024 nung shilem agitsü

Guwahati, September 23, 2023 (Agencies): Nagaland nungi arishi küm 13 nungi 15 tsüingda alir NCC cadets 25-i Republic Day Parade 2024 atema Marching Band nung shilem agitsü.

St Mary’s Cathedral Higher Secondary School, Lerie nungi NCC Junior Wing cadets 25-i shilem agiba ya Nagaland atema tang mezüng asütsü. Parnok ya

NCC Group Kohima kübok 1 Nagaland Girls Bn NCC, Kohima nung dena lir aser North East indang NCC Brass Band nung adentsü.

October 1 nungi 10 tashi Assam Rifles, Kohima nung NCC cadets-i training camp nung adentsü. December 25, 2023 nü parnok DG NCC, New Delhi nung Republic Day Camp atema apusotsü.

IOCL-i 10 kg composite cylinder saya



Kohima, September 23, 2023 (TYO): September 23 nü Hotel Japfu, Kohima nung Indian Oil Corporation Limited (IOCL)-i Nagaland nung Indane LPG distributors den senden ka menogo.

Iba sentong nung 10 kg Indane Composite Cylinder sayaogo.

Iba sentong nung alakteta jaokerji singer & song writer Temsukala Lemtur (Temsu Clover) liasü aser Chief General Manager (LPG), Indian Oil AOD State Office D. P. Vidyarthi, DGM (LPG) Indian Oil AOD SO Rajyoti, DLH Tinsukia Indane DO o AM (CC&LPG) Dimapur LSA-2 Himakshi Saikia nunger aden.

Nagaland nung 10 Kg composite cylinder sayaba tenüng nung CGM Vidyarthi-i Temsu Clover nem connection tasen ka agütsü.

“10 kg Composite cylinder ya kanga tepongpa kechiyong Steel Cylinder dang nungi 50% agi

tepongba” ta DLH Tinsukia Indane DO Kumrah-i ashi.

Iba anogomung nüngtem nung CGM (LPG), IndianOil Vidyarthi-i Seyie Gas Service indang LPG delivery van ka nung 10 Kg Composite cylinder & 19 Kg Xtratej bener sayatsü. Iba nung Xtratej Brand ambassador Sanjeev Kapoor dena liasü.

Nagaland nung LPG Distributors den senden amandang CGM (LPG), IndianOil Vidyarthi-i Missed call, SMS, IVRS, WhatsApp booking, IndianOil One App, Amazon, PayTM, Googlepay amala ajanga LPG refills Digital booking asüba indang jembü.

Paisa customers dang digital ajanga LPG book asütsü aser customer convenience & experience tajungba akümtsü atema PDC feedback agütsütsü ayongzük.

Vidyarthi-isa Distributors dang IndianOil indang tongti inyakyim “Nation First” nenshia metetdaksü.

PwD Commissioner Nakhro-i sign languages angazüktsü ajungshir



International Day of Sign Languages sentong nung Nagaland State Commissioner for Persons with Disabilities Diethono Nakhro den tangartem agiba noksa ka angur.

Kohima, September 23, 2023 (TYO): Nagaland State Commissioner for Persons with Disabilities, Diethono Nakhro-i sign language angazüktsü ayongzükogo.

Tabitha Enabling Academy ajanga International Day of Sign Languages sentong ayonga agidang Nakhro-i oshi nung tenokdangba maliba alima indang jembü.

“Alima nung sign language tetsükdaksü kecha meli amshitsü atema asenoki merangdi, narongjaker aser tenarong junga alir tsüingda timtem kecha melii tongteprateptsüa asenoki sign language angazüktsü nüngdaker” ta Diethono Nakhro-i ashi.

Nagaland nung disability sector atema teinyaksü aika lir aser nisungtemi sign language education junga mangatet lir. Nagaland nung matamabensaba ya maaksü ka ama züngshir aser mangatetep aika lir, ta lai ashi.

Matamabensaba ya meimchir temeyoktep nung shilem ka lir aser meimchir ajak balala yanglu. Anungji matamabensaba ya maaksü ka masü aser miimbanga mayutsüla ta Nakhro-isa shisem.

“Narongjaker ta ser balaka alitsü mesüra alima den tesentaktep kecha mayutsüla ta masü. Iba atema sign language lir aser iba ajanga narongjakertem tsüingda dang masü saka tanüngba nisungtemi narongjaker den

tongteprateptsü akoker” ta laisa metetdaksü.

“School classroom nung sign language sayutsüla aser ano loktiliba nunga iba ya angazüktsüla” ta laisa ashi.

“Kodang asenoki sign languages amshidir asenoki nisung million aika loktiliba nung shilem agitsü, parnok alizüngtem atongtsü aser shilem agitsü lenmang lapoktsür asütsü” ta disability commissioner-isa ashi.

“Tanü asenoki narongjakertem benjung amondang parnoki tasü aitba aser merangba atema tenüngsang agütsütsü tim. Maneni asenoki parnok tesayurtem, o meyiptsürtem aser advocates nem tetushi agütsür” ta laisa ashi.

PM Modi-i tanü Vande Bharat Express Train 9 tenzüksütsü

New Delhi, September 23, 2023 (Agencies): Prime Minister Narendra Modi-i September 24 anüingdang 12:30 ako nung video conferencing ajanga Vande Bharat Express train 9 tenzüksütsü.

“Asüng PM Modi-i yang nungi Jamnagar-Ahmedabad Vande Bharat Train tenzüksütsü” ta Minister of Railways Ashwini Vaishnav-i ashi.

Vande Bharat Express trains 9 ya Udaipur – Jaipur Vande

Bharat Express, Tirunelveli-Madurai-Chennai Vande Bharat Express, Hyderabad – Bengaluru Vande Bharat Express, Vijayawada – Chennai (via Renigunta) Vande Bharat Express, Patna – Howrah Vande Bharat Express, Kasaragod - Thiruvananthapuram Vande Bharat Express, Rourkela - Bhubaneswar – Puri Vande Bharat Express, Ranchi – Howrah Vande Bharat Express, Jamnagar-Ahmedabad Vande Bharat Express lir ta Prime Minister’s

Office (PMO) sangdong ka nung metetdaksüogo.

Rajasthan, Tamil Nadu, Telangana, Andhra Pradesh, Karnataka, Bihar, West Bengal, Kerala, Odisha, Jharkhand aser Gujarat nung connectivity tajungba kümdaksütsü atema train 9 tenzüksür.

Vande Bharat Express train nung world-class amenities aser Kavach technology dena advanced safety features keta lir. Tanga train tem dang nungi item train ajanga mapang tatsüba agir.

Manipur sorkari Myanmar den Free Movement Regime anener

Imphal, September 23, 2023 (Agencies): Manipur aser Myanmar tsüingda Free Movement Regime (FMR) anenogo ta Manipur Chief Minister N Biren Singh-i Honibarnü metetdaksü.

FMR ajanga India aser Myanmar arrtsülen alirtemi visa melii kilometre 16 tashi senzusenbong asütsü melar.

“Myanmar nungi Kuki-Chin nunger ozüing alema Manipur-i aruba ajanga FMR anener. Manipur nung Meitei aser Kuki nunger tsüingda rara nung iba ya tebilemstü tongtipang ka lir” ta CM Biren Singh-i ashi.

Paisa Centre sorkar dang iba tenangzükba ya Manipur nung teti atema shibangtsü

mepishiogo. India-i Myanmar den kilometre 1643 agi arrtsütepa lir aser iba nungi Manipur nung kilometre 398 lir. Manipur-Myanmar arrtsü nung kilometre 6 dang atsüdanga lir.

Ozüing alema arurtem aziüktsü atema border fencing ya kanga tongtipang lir. Border Road Organisation nem international boundary nung tesem kar atsüdangtsü atema mapa lezmüksüogo, ta Biren Singh-isa metetdaksü.

Tangalen nungi ozüing alema arurtem anüktsü aser jangjatsü atema Minister Letpao Haokip chairman ser cabinet sub-committee ka lir aser parnoki iba mapa maneni inyaka aotsü ta

paisa ashi. Manipur kübok detention centers balala nung Myanmar nunger 2700 tema jenoka lir.

Manipur nung ozüing alema arurtem indang biometric data bendenba mapa maneni inyaksü aser iba ya state nung lisopurtem kümzüka ayutsü atema lir ta Manipur Chief Minister-isa ashi.

“State sorkarisa poppy alutem mita aotsü atema Narcotics Control Bureau (NCB) aser Narcotics and Affairs of Border (NAB) densema luden ka tentetstü. Parnoki Unmanned Aerial Vehicles (UAVs) aser drones amshia mita aotsü aser poppy alutem raksatsütsü” ta Biren Singh-isa metetdaksü.

Kats Collection Top Model 2023 audition takok ngua agiogo

Dimapur, Rongjui/ ayongertemi metetdaksü. ka agitsü, kong Roko vn Jamir (Creative Director) aser den küm ka atema contract
September 23 (TYO): Kats Audition agiba sülen Top 8 Makeup-i make up sütsütsü. Keneivor Rio (Brand Head) agütsütsü. Top 5 Finalist nem
 Collection Top Model 2023 tetsürtem September 24 nü Audition nung nung densema liasü. sempet balala agütsütsü aser
 audition nung Nagaland aser Kats Collection Wedding tetendangertem rongnung Brand tekolakbai ashiba final ya October 7 nü Hotel
 kidanger state tem nungi nisung Dresses official page nung Moala Longkumer (Executive agi, iba tetoktepba akoker nem Acacia, Dimapur nung agitsü,
 39-i shilem agia kanga takok sangdongtsü aser iba sülen Director) Visituonuo Rio senpet sen 50,000 den Kats ta kasa sangdong ajanga
 nung tembangogo, ta sentong September 25 nü photoshoot (Brand Head), Opangtongdang Collection Wedding Dresses metetdaksü.



Arunachal Pradesh nung Connectivity Akangshir, Kechisarena Ajak Renloker

"Onoki Arunachal ya East Asia dangi kishizüng tongtipang ka asütsü atema meranga inyaker. Arunachal ya kanga tongtipang tesem ka asünung onoki modern infrastructure yanglur"
 ~ Narendra Modi, Prime Minister.

Terminal Building, Tezu Airport lapoker.

KETA ALIBATEM ASER TAJANGZÜK BALALA



Peak hours nung passengers 800 aser kümshia passengers lakh ti atema 4000 Sqm. tasazük Terminal Building tasen



Arunachal Pradesh aser North East nung air connectivity aser infrastructure development



ATR-72 Type tayimtsü atema Runway 1500 mtr. atsülanger, iba ajanga Tezu den linük sendakteptsü



Tourism, shishilembaba ajungkettsü, mapa adoktsü, koba ajanga northeast nung rongsenketzüng renloktsü



Tiptema maparen inyaksangshitsü atema environment-friendly terminal.



Arunachal Pradesh nung alirtem health aser educational facilities melamela angutsü

by

Jyotiraditya M. Scindia

Union Minister of Civil Aviation and Steel

in the august presence of

Chowna Mein

Dy. Chief Minister, Arunachal Pradesh

Nakap Nalo

Minister of Tourism, Civil Aviation, Arunachal Pradesh

Tapir Gao

Member of Parliament (Lok Sabha)

Nabam Rebia

Member of Parliament (Rajya Sabha)

Karikho Kri

Member of Legislative Assembly



Watch the event live on DD News

24th September, 2023 | 12:15 hrs. | Tezu Airport, Tezu, Arunachal Pradesh

'One nation, one election' committee mezüngbuba senden amen



September 23, 2023 nü New Delhi nung taoba mapang linük Tir, Ram Nath Kovind leniba nung 'One Nation, One Election' committee senden amendang tangokba noksa nung angur. Kasa noksa nung Union Home Minister Amit Shah, taoba mapang Lok Sabha Secretary General Subhash C Kashyap aser taoba mapang Congress lenir Ghulam Nabi Azad nungera angur.

New Delhi, Rongjui/September 23 (Agencies): India linük nung election ajak khenyongi dang agitsü atema asadangtsü asoshi tentetba 'one nation, one election' committee mezüngbuba senden Honibarnü menogo.

Taoba mapang linük Tir, Ram Nath Kovind leniba nung amenba senden nungji committee-i linük nung general election aser state assemblies election külemi agitsü onük nung Law Commission aser national party tem aser state party tem tangatetba asüngdangtsü lemtet.

Committee senden nungji Union Home Minister Amit Shah, taoba mapang Lok Sabha Secretary General Subhash C Kashyap, taoba mapang

Congress lenir Ghulam Nabi Azad nung densema committee züngsemtem aden.

Lok Sabha nung Congress lenir, Adhir Ranjan Chowdhury- a iba committee nung züngsem shima liasü, ajisüaka pai shidi ka ajanga iba committee nung adentsü memelungba metetdaksü.

Committee senden nungji kaket dak sendakba maparen, stakeholders den tongtepratepa jembitsü aser linük nung election külemi dang agitsü onük nung o lemtepa liasü.

Senden tembangba sülen committee-i sangdong ka ajanga, "Onoki national parties, state balala nung sorkar tenteta aliba party tem, Parliament nung züngsemtem aliba party tem aser state party

tem jaoka linük nung election ajak külemi dang agitsü onük nung parnok tebilemba onüktem angadangtsü onoki telemtetba agiogo," ta metetdaksü.

Committee-i Law Commission-a jaoka linük nung election külemi dang agitsü atema tebilemba asüngdangtsü asoshi jaokogo, ta law ministry-i metetdaksü.

Committee senden nungji lawyer, Harish Salve bo online ajanga dang aden aser Congress lenir, Adhir Ranjan Chowdhury bo maden.

Committee-isa 'one nation, one election' atema linük temzüng kübok Representation of the People Act den tanga ozüng kar yanglushitsü asoshi asadangtsü.

Küm 9 tsüngda India nung samaba tanur lakh 4.46 bo nguogo

New Delhi, Sept. 23 (Agencies): 2015 küm nungi tenzüka tang tashi nung India nung samaba tanur lakh 4.46 bo nguogo aser parnok teimbaka parnok kibongtem den longjemdaktsüogo, ta Honibarnü Women & Child Development Minister, Smriti Irani-i metetdaksü.

Sentong ka nung jembidang Smriti Irani-i, "Sorkar indang Mission Vatsalya kübok samaba tanurtem bushia angur. Tanübo onoki nüma tanga ya shiteter- samaba tanurtem rongnung tanur 4,46,000 jungnüabo ngutetogo aser iba nungjagi tanur 3,97,530 bo

parnok kibongtem den tanaben longjemdaktsüogo," ta metetdaksü.

Irani-i, 2021 küm Juvenile Justice Act benokba sülen nungi 'pei chir ama agiba' maparen ketdangtsüatsü atema courts masü saka district magistrates nem mapa nungloksür, ta ashi.

Coronavirus wara mapang nung India nung tanur aika lajartem akümba osang alima sünga prokshia liasü, ta lai ashi.

"Iba mapang nungji sorkari dang masü saka Supreme Court-ia tiyongtsüi aita nüburtem dang, nenoki tanur kari teyari nüngdakba metetra tanurji ketdangsertem

matsüngdangi anir oang, ta tuyua liasü," ta lai metetdaksü.

"Tanübo CCIs (child care institutions) nung tanur 45,000 nem vaccine agütsüba dang masü saka teyari balala agütsür," ta lai ashi.

Irani-i, tanurtem atema sorkar budget nung 2009-10 küm sen crore 60 lezmükja liasü saka yakumbo budget nung tanurtem atema sen crore 14,172 lezmüktsü, ta metetdaksü.

"2014 küm nungi tenzüka child care institutions ajanga onoki tanur lakh 7 dak tema nem teyari agütsüogo," ta Union Minister-isa metetdaksü.



September 23, 2023 nü Ghaziabad nung gac cylinder ka apokba ajanga ki ka chirepba sülen kümzükba maparen inyakdang tangokba noksa nung angur.

Uttar Pradesh nung kenüyongi Ayushman Card lakh 1 renem

Lucknow, September 23 (Agencies): Uttar Pradesh sorkari kenüyongi Ayushman cards lakh 1 renemtetba ajanga otsü tasen ka yanglutetogo; September 21 nü state sorkari iba card lakh 1 tashi renemtetbaji linük nung kenüyongi card teimtiba renemtetba asütsü.

Uttar Pradesh sorkari X ajanga, "September 21, 2023 nü linük nung Ayushman cards lakh 1.5 renemtet aser iba nungjagi lakh 1 bo Uttar Pradesh kija nung renemba lir," ta metetdaksü.

State sorkarisa, "@myogiadityanath leniba nung state sorkari nisung ajak nem medical facilities ajanga tajangzük balala agütsütsü atema meranga inyaker. Linük tesem ajaklen Ayushman Bharat Digital Health Mission atema inyakba maparen nung state sorkari tajungtiba inyaktetogo, ta iba mapa ajanga kuli sayur," ta metetdaksü.

September 26 nungi tenzüka New Delhi nung anogo ananü Arogya Manthan programme agiba mapang nung Union Health Minister, Mansukh Mandaviya-i state-i inyaktetba mapa atema sempet agütsütsü.

Brihostibarnü Union Health Secretary, Sudhansh Pant-i,

Ayushman Bhav Campaign kübok anogo pezü tsüngda Ayushman Bharat cards lakh 4 dak tema yangluogo, ta metetdakja liasü.

Paisa, Ayushman Bharat Health Account (ABHA) IDs lakh 20 yangluogo aser Ayushman Bharat-Health & Wellness Centres aser Community Health Centres nung lakh 20 dak tema registration agiogo, ta metetdaksü.

September 13 nü linük Tir Droupadi Murmu-i 'Ayushman Bhav' campaign ya tenzükja liasü.

Iba campaign nükjidong ya linük nung nisung shinga mezüngdoki yimtsüng aser jila ajak nung healthcare services agütsütsü atema lir.

Iba campaign kübok mapatong asemji - Ayushman - Apke Dwar 3.0, Health and Wellness Centres (HWCs) nung Ayushman Melas aser yim ajak nung Ayushman Sabhas lir.

Ayushman Apke Dwar 3.0 mapatong nung PM-JAY scheme kübok temsüa alir tanüngba nisungtem nem Ayushman cards agütsütsü. Ayushman Melas mapatong kübok ABHA IDs (Health IDs) yanglutsüba den Ayushman Bharat Cards lema agütsür.



September 23, 2023 nü Vigyan Bhawan, New Delhi nung the 'International Lawyers' senden nung Ato kilonser Narendra Modi-i Chief Justice of India (CJI), Justice DY Chandrachud den jembidang tangokba noksa nung angur.

Uttarakhand nung UCC draft asütsü atema ita 4 atsülangtsüogo

New Delhi, September 23 (Agencies): Uttarakhand nung Uniform Civil Code (UCC) atema draft renemtsü asoshi nungloksüba committee nem ano ita pezü mapang atsülangtsüogo.

September 27 tashi nungbo UCC draft renemtsü atema Committee-i nem mapang atsülangja liasü, ajisüaka tang agi pezübenbuba mapang atsülangja ano ita pezü agütsüsemogo, ta Additional Chief Secretary, Radha Raturi-i metetdaksü.

Iba committee ya yaküm May 27 nü tenteta liasü. Committee nung tongtiji taoba mapang Supreme Court judge, Ranjana Prakash Desai lir.

Taküm June ita tatembanglen tashi nungbo state sorkar nem UCC draft renema agütsütsü atema parnok nem mapa nunglokja liasü.

Yaküm Uttarakhand assembly election atema nüboyimba mapang nung BJP-i parnoki takok ngura state

nung Uniform Civil Code benoktsü, ta nangzüka liasü.

Ajioda parnoki assembly election nung takok anguba sülen Chief Minister, Pushkar Singh Dhami-i aniba sorkari mezüngbuba cabinet senden nung UCC draft renemtsü atema committee ka tentettsü telemtetba agia liasü.

Uttarakhand sorkari iba committee nung mongin aika züngsem shima lir. Iba committee yagi Uttarakhand nung tang aliba ozüngtem lenla aika nungi asandangar. Parnoki kiyimba, balalulaba, kiojen temeden balala, senmangba aser tangar tanur ka pei chir asütsü atema agiba densema onük aika nung ozüngtem asadanga draft renemdar.

Yaküm November ita nung mezüng committee nem ita trok mapang agütsüsema liasü aser taküm May ita nung ano maneni ita pezü agütsüsem; iba sülen maneni September 27 tashi mapang agütsüsemba sülen maneni ano ita pezü agütsüsemogo.



TIR YIMYIM YIMOBILEM (EDITORIAL)

DIMAPUR AMUNGNÜ, RONGJUI (SEPTEMBER) 24, 2023

Temulungjang temerük

Nisunger inyaksangshi aser libaliru nung tesüngmangtsü kaji asen mulungjangi kechi bilemer yamaji tenük agia angur. Ibaji shisatsü temerük aser tajung bilemertem asoshi temoatsü saka shisatsü memerük aser tamajung bilemertem asoshibo tejashitsüka asütsü. Tashitemetertemi ashiba agi, asen kolok aser mulungjang nung tangar yimya indang bilemetsü aser tangoktsü tashi ka agüja lir, anungji alima kati aotsü asüandang asen ket nung iba lima map bener apuso ama, kechi mapa nung südir süaka asenok ket nung temulungjangi bilemba map ka lir. Aji oda, Iba map-ji repranga dang asenok aotsü aser aseni lenmang memetetaka iba map jagi anitsü. Ibaji jangratemtsüka saka ano tajidaksüka lir. Tatishtitsü agi, asen ket nung aliba mapji meshitakra aseni tongnüba tesem matongtsü. Tetezü aseni abenba mapji tai süra tai lenmangi anitsü. Aji oda, Khristan taküm nunga asen ket nung bena aliba map-ji kanga tongtimbang asütsü. Ibayongji, Laishibai ashir, temulung merüka alirtem tsüngdang ajak merüka angur saka memerükertem tsüngdangbo kecha temerük maka. (Tita 1:15). Asen temulung nung kechi bilemdir, ibaji aseni abenba mapji lir, anungji aseni tangar dak tamajung dang ajitetra asen ket nung aliba mapji tamajung bilemba map asütsü. Asenoki kechi bilemer, ibaji asen taküm yimya agi sayur. Asenoki benshiba jakla, jembiba o aser taküm yimya agi asenoki komaka bilemer, ibaji tangar tsüngdang sayua adoker. Aji oda, asen mulungjang nung tenükmerem, mokokaji aser ochimashi temenentem aliba agi, asenoki tangar taküm nunga kasa temenentemji dang angur. Iba jagi asen mepelar aser tangar den meputepteter. Iba ama temulungjang memerükba agi teti tangar dak tamajung reprangteter aser aitsür. Ajisüaka, asenok nük nung anak ia yur, kodaser tangar nük nung anak ia aliba endoktsütettsü (Luke 6 :41- 42). Asenok mulungjang merüka lira, asenoki tangar dak tamajung mereprangtettsü aser tangar dak mulung lemtettsü. Aiben asenok ochimashi asüba agi asenoki tangar daka temulung malemer aser tenüngsang agütsütsüsa tajung tilaka ta mangur. Ajisüaka, asen mulungjang merüka lira, Tsüngremi koma tangar dak repranger yamaji asenokia angutsü. Asen kiyongerbo mesüra asen adianu aser medemertembo nisung tajung ser nung asenoki temulungjang nung parnokji majung ama bilemba agi asen nükdang majung angur asütsüa akok. Aji oda, asen tenük nung temenen aliba agi tangar dak tajung alibaji reprangtettsü makoker. Anungji, Laishibai ashir, "Tenükji temang milen lir. Nü nük junga lira, nü mang ajak tesangwa agi asüngtsü, saka nü nük mejungi lira, nü mang ajunga tamang agi sünga alitsü." (Mathi 6:22). Atangji, temulung nung abenba mapji asen tenük agi angur asünungji, asen taküm pelaa alitsü aser jashia alitsübaji aseni asen mulungjang nung bena aliba map dakji dang keta lir. Aji oda, asen tenük agi anguba agi asen mepelai kümra mesüra asen tenük agi anguba tamajungtem ajanga tangar den meputepteti lira, Tsüngrem dang temulungjang tasen aser temerük ka meshitsü kanga nüngdaker ta aseni angatetdi. Kü mulungjang merüktetjang aser kü dak tamajung bilemba aser tangar dak tamajung anguba memerükba mulungsentsü endokjang ta sarasademdi. Ni tangar indang tamajung bilemba map bena aliba ya tajung bilemba map agi melenjang ta sarasademdi. Tsüngremi temulungjang temerük aginer aser asenoka asen mulungjang merüka ali nung dang pelaa alitsü. Temulungjang ya tepela apokdak, anungji temulungjang merüka lira, iba nung jagi apokba tzüjia temerük, tajung aser tepela tzü asütsü.

OLEMSABANG

Mitkar meita anüktsü atema tanga mitkar kar ayutsü asü ???

- L. Kika Pongener

(Maneni yashi adok nungi...)

Otsüla oboula nungeri "Nabong nem Batio nuka toktsüba ama" ...ta shin o ka jembir. Nabong nem batio (Tamol Patta) nuka toktsü nungbo pai-ang mejakmatsü. Tetezü... tanüktsü ayusang jagi-ang chimatsü ta jembir. Aji oda, iba den küsaji Nagaland Police Central Store nunga atalokogo. Sürabangla, asen lima nungbo tanüker/mitkar ayuba ya küli küptok ayuba mapa ka dang asü (?)... ta nuburtemi tamang mekateti bilemer. Anungji asen lima nung sorkar-i ayuba tanükertem/mitkartem dakji, nuburtemi tamang mekatettsüsa asübaji...Tanüker/Mitkartem atema-a teshisadangtsü tuluka lir. Koba mapa nung sudir suaka, sorkar ketdangsertemji nuburtemi tamang kaatettsüsa alitsüla.

Anungji kodang nuburtemi parnok dak tamang mekateti, mesura temulong melemteti kümdir, alima aser nubur matsüngdang tamakoker telok ka asütsü. Sorkar ketdangsertem atema ibaji tongtipang tangatettsü lesson ka asütsü. Anungji shir koba telok/tenzüker/ketdangser südir süang, sorkar-i aser nuburtemi temulong lemteta kechi mapa inyaksü nungloktsür, aji nübur tenzükbaji Tsüngrem dang tenzüker (Service to people is service to God). Anungji mitkartemji tetsür-tanür anema maaksü mapa tamajung inyakba (Rape & Molestation), nisung puer aoba (Kidnapping), iba amala mapa tamajungtem nungi tekümüzüker asütsüla, kechiyong tanü putu nung iba ama mapaji anogo shia amai atalokba 'Social media' nung angur. Aji oda, mitkartemji tekümüzüker asütsü melena...Iba amala mapa nungji parnoka dener inyakra ??? Sürabang, iba ama mapa tamajung inyakerter nungi kümzükerji shirnok asütsü...??? Atangji, tanü putu ya shinga daka temulong melemtettsüba tensa mapang kati menepogo. Tanü India lima City tulutem nung, kin tilatem aser talisa North East India nung alir kintem dak kanga mezüngmeshia, meinyaktsüyim mapa aika sademsadema inyaker, aser iba osangji Police Station nung oa osang (FIR) agütsünung Police-temi magizükba, aser meyiper Police-tem jagi-ang amokmerenba otsü/osang 'Media' nung angur aser angashir. Surabangla, iba ama timtem ajurudang nüburtem shirnok dak jenoktsü ...??? Aser nuburtem kümzükerji shirnok asütsü...???

Ajak dak alaka, shir koba telok sudir suang, sorkar-i aser nuburi temulong lemteta aser tamang ka-a nungloktsüba mapa nung, ozüng amertem aser mitkartem jagiang ozüngji raksara, mesura aibelena inyakra...!!! Iba telok aser iba department dakji nuburi tamang akatsü asü makatsü...??? Aji oda, nuburtemi kodanga tamang mekatettsü aser akümütsüba mebilemetsü. Aji oda, tanükertem/mitkartem ya nubur kümzüksü aser nubur meyong rongsen (Public Property) kümzüka ayutsü atema shimtetba telok lir. Ajisüaka, parnoki nübur aser nubur meyong rongsen kümzüka meyetetra, parnokji menungdakba telok ka ama nüburi züngshitsü aser sorkar rongsen angadi nung chireptsür telok ka ama züngshitsü. Anungji koba telok südir süaka, nüburtemi tamang katettsüsa aser temulong lemtettsüsa ochishia aser nendak-nendaka tenzüksüla. Aji oda, tawa-tanü tatalokbatem ya angudang, sorkari ayuba mitkartem ya meittsü atema, ano tangar tashi tulu akaba mitkar telok ka shimteter ayu nungang, nübur meyong oset (Public Property) ya kümzüka/wazüka yutettsü südi ta bilemer.

Shillong Arogopur dangi Salem bener yoker

-S. Nuken Longkumer, Naga United

Tsüngrem osang tajung proker koda jangratemtsü. Naga United Ao Arogo nung pastor Sademi sendong tajung ka yangluteter Shillong Arogo nungi arurtem nüpu tajung par aseme shilem tulu August 27 Sunday anogo nung tio tayongzükbata tulu agütsü dang Tsüngrem osang tajung prokertem Laishiba nungi mim o tulu tsungpret yalok yok ama ayimtenogo!! Koda tepur tajung koda jangratem !! Shillong nungi osang tajung abenertem nenok ajak moatsütsü onoki sarasademtsüogo Shillong Ao Arogo asoshi ano Tsüngremi mangdang tuluba atalokdakjang ni?? Tanü Laishir nungtugo takum aika ajurua arudaki, ano karbo onsara mongintem jendi ajangshia arur!! Tajung puraike lir, tajungtiba ji alimai nükshir, tamang nung Nokinketer Tsüngrem O ochi angatetsü atema kodang U.S nunger nungtugo takum ka Dr. Armstrong mezüng ita nung pa tetsüng ajemok, pai Laishiba lapoka azüng aser Tsüngrem nem tenüngsang agütsür USA nisan sala, meyipa alu temulung meyip Tsüngrem tesümgangtsü sayatenya mapatem sangdonga taküm kulitem agütsüa jaja??

Ita lima nung jajartem aser tetsüng ajemokertem Tsüngrem tenung asanger iba mapa ajanga Tsüngrem O tali tarokba ajurur?? Tanü alima nung Tsüngrem O anemer asoshi tenük agi manguba misem Tsüngremi asenok asoshi renemja lir?? Iba misem jagi memchir taküm million aika samatsügo anojungi !! teroto nung anü luogo? Tsüngrem osang tajung abenertem ano tali ayimtenang, sangdongang, iba osang angashir meinyakerter asoshi sungdongzüng nung pa ataloka lir, tejang matangba lendoktsü tenyar yokogo?? Anungji Laishiba nung shina aser zülua aliba mapa ajak joko ataloka aruba asenoki angur!! Tsüngremi asen meimchir yangludang pa kong nungi liasü ibaji nenok tekolok nung meyangly?? Tetem nung Tsüngremi asenok nem ozüng ka agütsügo kü o nungi tilaka danga indoknungbo, mesüra tiazü purateta inoksem nungbo taküm sungdong nungiu lepdoktsü? Tesümgangtsü Tsüngrem O?? Shillong Arogo ano talu temoatsü nung züindakjang ta sarasademtsür, otzü aika lir saka mezülumatsü.

Khrista temeim salem.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

India sorkari linük nung Khristan anema inyakba report meshir



September 21, 2023 nü New Delhi nung National Commission for Minorities-i United Christian Forum (UCF) nungi züngsemtem den senden amendang tangokba noksa nung angur.

New Delhi, September 23, 2023: Ita pongu tejaklen Khristan telok kati Ato kilonser, Narendra Modi dang linük nung Khristan anema inyakba nokdangtsü mepishiba sülen tang India sorkar kübok minorities commission-i Khristan telok ka dang linük nung Khristan anema inyakba tatalokbatem osang tejangja agüjang, ta metetdaktüsügo.

September 21 nü senden amendang National Commission for Minorities-i United Christian Forum (UCF) dang, parnok taruba senden mamandang, ita ka tsüngda report agüjang, ta metetdaktüsü.

Minorities Commission chairman, Sardar Iqbal Singh Lalpura-i, Khristan telok jagi report agütsüba sülen parnoki ibaji asadanga report ka renemer Modi nem agütsütsü.

Osangbener den jembidang UCF national coordinator, A. C. Michael-i, taküm April 9 nü Ato kilonser Modi-i New Delhi nung aliba Sacred Heart Arogo Tenla ki semdangba sülen UCF-i shidi ka ajanga Ato

kilonser dang linük nung Khristan anema inyakba nokdangtsü mepishia liasü, ta metetdaktüsü.

UCF-i, India nung state 28 nungi state 11 nung anti-conversion ozüngtem benokba sülen Khristan anema inyakba kanga bulua kümogo, ta metetdaktüsü.

September 21 nü osangbener den jembidang AC Michael-i, anti-conversion ozüng ya linük temzüng alema lir, kechiyong linük temzüng kübok Arrla 25 ajanga India nung er ajak nem yimsü temeden agütsür, ta ashi.

September 21 nü Minorities Commission ajurua senden nung shilem agirtemji Michael den All India Catholic Union otongdar, John Dayal aser UCF executive züngsem ana-Tehmina Arora aser Siju Thomas nung liasü.

Senden nungji Minorities Commission chairman, Lalpura-i Khristan lenirtem dangji, Khristan tebilemtsü onük atema commission-i inyaktsü aser Khristanemi timtem ajangshiba tesemtem

jagi bushisüngdangba teams yoktsü, ta metetdaktüsü liasü.

Michael-i Commission nem agütsütsü renemba report nungji Khristan anema inyakba tatalokba osang ajak agütsütsü; iba dak alia anti-conversion ozüng kübok Khristan amakba densema India nung Khristanemi ajangshiba timtem balala metetdaktüsü, ta metetdaktüsü.

Khristan lenirtem jagi Commission dang, National Minorities Commission nung Buddhist aser Sikh nungi züngsemtem lir saka Khristanem nungibo züngsem ka danga iba commission nung mali, ta metetdaktüsü.

Ajioda Lalpura-i Khristan lenirtem dang, tekeraba nung Commission nung Khristanem nungia Commission nung züngsem ka züngoktsü, ta nangzük.

Tamalen Modi dangi züluba shidi nungji UCF-i sorkar mapa, shisaliok rejutem aser legislative bodies nung Dalit nungertem aser tribal Khristanem-a züngoktsüla, ta mepishia liasü.

India nung Khristan anema inyakba tatalokba 525 lir: UCF

New Delhi, September 23, 2023 (Agencies): Taküm January ita nungi tenzüka August ita tatembanglen tashi nung India nung Khristan anema inyakba tatalokba 525 lir, ta United Christian Forum (UCF)-i metetdaktüsü.

Tan ita tetenzüklen UCF-i, India nung Khristan anema inyakba tatalokbatemji teimbaka taküm June ita nung liasü; June ita nung Khristan anema inyakba tatalokba 89 liasü, ta ashi.

July ita nunga Khristan anema inyakba tatalokba 80 liasü aser May ita nungbo Khristan anema inyakba tatalok 47 dang liasü.

India nung states/union territories 28 nungi 23 nungbo Khristan anema inyakba tatalokbatem lir; talisa tang India nung Khristan alitsü majungba tesem 13 lir, ta UCF-i metetdaktüsü.

Chhattisgarh state kübok Bastar nung Khristan anema inyakba tatalokba 51 liasü aser kasa state kübok Kondagaon nunga Khristan anema inyakba tatalokba 14 liasü.

Taküm January ita nungi August ita tashi nung India nung anti-conversion ozüng kübok Khristan 520 puogo, ta New Delhi nung amenoka aliba Khristan melungtet

telok- UCF-isa metetdaktüsü.

Khristan anema inyakba tatalokba teimtibaji Uttar Pradesh state nung liasü; iba sülen Chhattisgarh aser Haryana na lir.

Chhattisgarh aser Jharkhand na nungbo tesem aika nung yimdaklirtemi Khristanem loktiliba nungi züngdokba tatalokba 54 liasü. Tesem kar nungbo Khristan aluyimertem alu arühtsü-a memela.

Linük yimtiba, Delhi nung Hindu yimsü alia amangertem Khristanem tekülem sentong tagidak mapang timtem agütsüba tatalokba pezü liasü.

ANOGO ABEN TSÜNGREM DEN

Tesülen tajungtiba

T.Ken 132:1-10

Ne taküm nung tarongba tejangrabaji kechi? Ne kolok aser temulungjang sünga aliba pungmangji kechi? Dawid chuba pungmangji Kibuba külemdak ki ka yanglutsüba liasü. Iba ken nung Pai iba indang asenok dang ashir. Asenok rongnunga iba ama pungmang akar lidaktsünüali-teyanglur, teraksar masü.

Dawid taküm nung mapang talangba ka sepai ka liasü. Pai Israel nung tsükchirtem nungi kümzük aser linük nung yimjung bener aru. Saka Pai rara nungi yanglutsüba dangi meyip. Pai noklangnok mertsüng den melentepnü. Pai ashi, "Tsüngrem alitsü asoshi ki ka ni mangu tashi ni aonunga memejangtsü".

Saka Tsüngremi Dawid tejangraba tulu aser temeshi madalokdaktüsü. Solomom, Pa jabasoiang tekülemdakji yanglu. Tamasabo Dawid mepelai liasü saka Pai ashi, "Ibai Tsüngremi mulungba süra ni agizüktsü". Idangji kanga tesüngmangtsü mapa inyak: Pai tesülen putu yaria tekülemdak yanglu. Dawidi Sentongji agütsü aser hon, taripi, senti long aser merang sen million aika jenjang yutsü.

Asenok sendong aser tejangrabatem ajakbo asenok mapang nung mataloktsü akok, saka asenoki tanabuba tajungtibaji inyaktsü akok. Tsüngremi asenok alizüng matalokdaktüsü, asenoki pa alizüng tongtetsü langa inyaktsü akok, Pa alizüng tongtetsü asoshi asenoki kar yaridi. Asenoki agütsüdi. Asenoki asen shisatsü agütsüdir, asenoki ajungshidi. Asenoki ajak inyaktsü makok, saka asenoki langkabo inyaktsü akok.

Ne pungmang Tsüngremi mulungba nung matalokra, ne sempet aser rongsen ajanga kar pungmang atalokdaktüsü kari yariang. Kodang nai tangar nungsang anguba dang nungi Tsüngremi sentsüwangshi asoshi tali bilemdir Tsüngremi na Pa sentong ataloktsü asoshi lemang timba nung amshitsü.

Tsüngremi anguba lemang tajungtiba nung Tsüngremi na amshidakjang.

Dimapur Temeket Aor Ordained Minister Fellowship mensem nung lemtetbatem

1. Nagaland Dry mapa kümteetsü onoki nongiter. Anungji lim Arogotemia yijemertem atema tapet sentong yanglua agitsü ajungshir. Nüngdakra Aor MLA 11 den ajurutepa iba indang jembitsü.
2. India nung Khristanpur reshikangshiba atema Indian President dangi shidi ka zülur Nagaland Governor ajanga agütsütsü.
3. ABAM atema Laishibaji tatembang bangdak. Anungji Tetsür o tetsür aser tebur o tebur kibong akümbaji ABAM-i magizüker ta lemteta lir. Iba telemtebaji onoki maneni nungiter.
4. Arogo tenteta makaba tesem nung Temeshi Kiyimba Kulizüng agütsübaaji Laishiba tesayuba masü. Anungji yamala nungji Aor Aotsür shingaia shilem magitsüla.
5. Nagalima Khrista Asoshi : 1958 Changtongya nung Khristan Lanur Mungdang ajanga Nagalima Khrista Asoshi ta tsüraburtemi sangdongba amaji Nagalima mekümdaktüsü, kechi lima ka kümdakjang ta ashitsü? Anungji temesüzükba, amokmeren, aser tatitang balala arudang, tsüraburi nangzükba nungji nüburtemi akanga ammettsü onoki ayongzük.

Kanga Pelar

Mapang ajak nung Dimapur Ao Baptist Arogoi Ordained minister mensem atema arogo Office melaba den onok nüngdak ajak peria agütsüba asoshi onoki kanga pelar.

Rev. Dr. Kari Longchar Tayonger Rev. C.Walu Walling Tezülur

AO OSHI ANGAZÜKDAK:
TANÜ ANGAZÜKTSÜBA OJANG



Salukümer

(n) tatembanglen nokdakba mitkar (watchman)

* Salukümeri aonung yim anüker.

Sama

(v) makai aküm (lost)

* Ozü nashi arem nung sama.

OLONG PAITEP # 6646

1		2				3		4		5
			6							
	7		8							
9					10			11	12	
			13		14	15				
16					17			18		
			19		20					
21		22								23
24										

TIPIEN

- 1. Saku - (4)
- 6. Songjen - (7)
- 7. Mall/Tazung - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzunglu den külemi tsüker - (3)
- 17. Aso tila - (6)
- 20. Tashi maküm - (4)
- 24. Tenung kasa jatepba - (7)
- 25. Ki yangluba oset - (4)

LANGTSÜNGLEN

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü teubaba - (3)
- 5. Anungdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. ___ tatsu - (3)
- 12. Tebur kidong aser zünga kasa tsungda jatepba - (4)
- 14. Pela agizükba tapu ka - (5)
- 15. Tenung atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

OLONG PAITEP # 6645 TELANGZÜBA

TIPIEN :

- 2. Tebenjem, 5. Talila, 8. Tang, 10. Temokok, 11. Amar, 14. Mezung, 15. Mokobung.

LANGTSÜNGLEN :

- 1. Tatem, 3. Bala, 4. Jepdak, 6. Leper, 7. Angi, 8. Totzü, 9. Mado, 10. Tatsük, 12. Angur, 13. Tebu.

NAI-A YA METETTER MA



Narayana Health-i anogo ka nung ECGs 3,797 agiba ajanga Guinness Book of World Records nung züluogo. Bengaluru nung aliba Narayana Health-i ghonda 24 nung electrocardiogram screenings teimtiba asüba atema otsü tasen uanglutet. Narayana Health ya private healthcare provider ka lir aser September 21 nü parnoki iba otsü tasen yanglutsü meranga liasü.

Tanur asoba anogo nung salem osang den noksa angati adokdaksünura - Tenung, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelta e-mail : tiryimyim@gmail.com nung yokang mesüra Tir Yimyim bureau tem nung agüjang.

- 1. Tenung :
- 2. Tasoba anogo:
- 3. Küm :
- 4. Class :
- 5. School :
- 6. Talidak :
- 7. Salem osang :



CM Sarma kinungtsüi Gaurav Gogoi anema defamation suit benok



Gaurav Gogoi

Guwahati, September 23, 2023 (Agencies): Assam Chief Minister Himanta Biswa Sarma kinungtsüi Congress MP Gaurav Gogoi anema defamation suit ka benokogo.

Riniki Bhuyan Sarma tenung nung senior advocate Devajit Saiki-i Hokolbarnü Kamrup Metropolitan Court nung Civil Judge (Senior Division) tsungdang benokba osang metetdaksüogo.

"Kü client-i Gaurav Gogoi anema Rs 10 crore indang defamation meshiogo. Pai X nung tweets balala asüba atema iba ken o ya benok. Onoki subsidy meshia application kecha magütsü ta onoki jangjajangja shiogo" ta Saikia-i ashi.

"Onoki subsidy meshiba maparen kecha meinyak saka May 26 nü ozü client (Riniki Bhuyan Sarma) company anema show cause notice ka agütsü aser iba sülen Ministry of Food Processing nungi email ka aru" ta Saikia-isa metetdaksü.

Gaurav Gogoi-i taoba nung Ministry of Food Processing website indang snapshot ka lemsatepba nung Centre sorkari Riniki Bhuyan'er company nem Rs 10 crore grant agütsütsü mulunga agizük ta tai tonglokja liasü.

Gogoi-isa Parliament nung Union Minister of Commerce and Industry Piyush Goyal-i langzüba ka lemsatep.

"Ministry of Food Processing website ajanga nisung tenung aser la adenba company tenung tejanga shia lir. Rs 10 crore sorkar grant mulunga agizükogo. Parnok indang website hack asü nungbo Union Minister dang shiangma" ta Gogoi-i September 13 nü 'X' nung zülü.



Lt. R. MAONGKÜMLA LONGCHAR
08-04-1933 - 15-09-2023

"SHIBAI Tematiba jenokdak alir, Pai ajak Takoksang akhümpok nung alitsuü".
Tenünsang ken 91:1

Mulungnen O

Onoki teti meima aliba Ojala asür Lt. R. Maongkümla Longchar (Waromung) la sür onok mangyim tia nung alidang, akümlir sobaliba tajung dak sentakba maparen inyaka aoba mapang ajak nung nüburtemi ana aser talang nung alir shirnokisa sarasadam, nübu, rongsen aser tenla balala agi yariogo, nenok ajak dang kanga pelar. Tarutsü anogotem ajak nung Tsungremi nenok ajak mojangma ta onoki sarasademtsür.

Amen!

- Temeim chirnurtem aser kinungertem.

Mizoram CM-i Dr Lalrinawmi nem Zakapa Award 2023 agütsü



Aizawl, September 23, 2023

(Agencies): Mizoram nung Zakapa Award 2023 selection committee ajanga Dr Lalrinawmi Ralte nem iba sempet agütsütsü shimtet.

Mezüngbuba Zakapa Award ya Tlangnuam, Aizawl nung alir Dr Lalrinawmi nem agütsü.

Department of Social Welfare & Tribal Affairs, Government of Mizoram-i tanü Vanapa Hall, Aizawl nung sentong ka ayongzüka agidang iba osang metetdaksü.

Zakapa Award angur nem Chief Minister Pu Zoramthanga-i kulikaket ka aser sen lakh 1 senpet agütsü liasü.

Tetsürtem asoshi inyakba aser tetsür yariba individual/institution/NGO nem Zakapa Award agütsütsü tawa tu tenteta liasü.

Iba sempet ajanga loktiliba nung tetsürtem kümzüka ayutsü osang prokshitsü imlar.

Iba sempet ya 1891 nung kanga dang nungtugu Mizo (Fanai) Chief ka nungtem nung jaloktsüogo. Pai Khawhri village chieftainship inyakdang South Lushai Hills Superintendent CS Murray-i pa

Khawhri nung yipzükdang tetsür ana meshi.

Saka Zakapa-i iba takhangba magizük aser ibaji par kin ozüng alema lir ta ashi. Idangji Khawhri nung telok ana tsungda khatap aser British sorkar kükok Zakapa apu. Maneni Lushai Hills nung aliba British ketdangsür ajak dang ibala yimya tamajung meinyaktsü tetuyuba agütsü liasü.

Loktiliba nung tetsürtem kümzüka ayutsü aser ajungkettsü nükjidong nung Department of Social Welfare & Tribal Affairs-i taküm nungi Zakapa Annual Award agütsü tensüker.

Dr Lalrinawmi Ralte-i Bangalore nung küm 27 tashi liyonga aru aser idangji la United Theological College nung Professor liasü aser Northeast Solidarity ta ser telok nung President ama inyaka liasü.

Lai lokti dak sendakba tebilemtsü aika atema mapa inyaka aruogo aser tetsür dak shi nung tashiyim agi medema atema volunteer activities inyaker.



Soyim Shisaluyimer Telongjem-i ayongzüka angati nübutoka Ungma yim süngküm, süngkong ki, arju ki aser yimtsung telungtet nung aliba tongtibang tesem merükteta amungba mapang tangokba noksa nung angur. Iba nübutok sentong nung kaketshir parnok 63-i shilem agia liasü. Ungma, 23rd September, 2023

Poland PM-i Zelenskyy dang Poland nungger mezüngmeshi masütsü ashi



Warsaw, Rongjui/September 23 (Agencies): Ukraine indang jang import asüba dak sendakba nung Poland aser Ukraine na mangatettep atoker aliba mapang ka nung Polish tir-i iba mangatettep bentettsü ayongzükba sülen Poland Ato Kilonser-i Ukraine tir Volodymyr Zelenskyy dang Poland nungger tanaben mezümeshi masütsü ashi.

Iba hopta New York nung United Nations General Assembly nung o jembiba mapang, Russia-i Black Sea lenmang shibangtsüba sülen Kyiv-i jaotsü belenshitsü atema ali lenmang wazüka ayutsü merangdar, saka janotsü belenshiba dak sendakba nung yimden yimsüsüba dak sendakba nung tetsükdaktsü adokba ajanga Moscow nemang teyari agütsüdar ta ashiba ajanga kidanger Warsaw mepeladaktsü, shirnok Russia anema nokdakba mapang tongtibang partner ka lir. Poland-i taoba hopta Ukraine indang jagotsü belenshiba nung tenokdangba ka agüja liasü. Iba jenjang agiba ajanga Kyiv aser Warsaw na tesendaktep mejungi kümogo, shirnoki taoba küm Russia-i Ukraine amak tenzükba sülen teyari tulu agüja arudar.

"Ni tir Zelensky dang pai tawa UN nung jembiba mapang ama Poland nungger kodanga mezüngmeshi tesü ta shiner," ta Ato Kilonser Mateusz Morawiecki-i Hokolbarnü

election atema nüboyimba sentong ka nung jembiba mapang ashi.

Hokolbarnü Poland tir Andrzej Duda-i ashiba agi, Poland aser Ukraine na jangotsü belenshiba dak sendakba nung mangatettep atoker aliba ajanga bilateral tesendaktep tajung aliba dak kongshitsü.

"Ukraine nungi Poland shishilembadaki jangotsü bener aruba dak sendakba nung mangatettep aliba ya Polish-Ukrainian tesendaktep nung shilem tila ka dang lir ta ni amanger," ta Duda-i business conference ka nung ashi. "Iba ajanga parnok dak kecha balaka mekongshitsü ta amanger anungji asenoki asenok yongtsü nung iba ya bentettsü nungdaker," ta tiri ashi.

Jangotsü import dak sendakba nung mangatettep atoker aliba mapang Ato Kilonser Morawiecki-i, Poland-i Ukraine dang joko ojang dang prangbong injangtem yoktsü ta ashiba sülen Duda-i iba olen ya lemsatepa liasü.

"Onoki Ukraine dangi joko prangbong injang ojang dang yoktsü, kechiyong onoki Poland nungger sepaitem nem tanü asüng yangluba prangbong hadirtem agütsütsü," ta Morawiecki-i Bodhbarnü ashi.

Poland nung October 15 nü parliamentary election agitsü lir aser Morawiecki-i aniba ruling nationalist Law and Justice (PiS) party ya far right puri aija

arudar. Sorkari Kyiv nem teyari agütsüba atema aija arudar.

Politico nung ocet ka nung Poland Foreign Minister Zbigniew Rau-i ashiba agi, Poland-i iba rara tembangba sülen Ukraine tashi taitba aser rongsenketzünnga tali tajungba kuma aotsü imla atar aser Warsaw-i Ukraine NATO aser EU nung dendaktsütsü asoshi maneni nongita yaritsü.

Ajisüaka New York nung osang benertem den sensaksemba mpang Rau-i ashiba agi, Ukraine dak sendakba nung Poland policy memelenshi lir, ajisüaka linük ana tsüngda tesendaktep dak sendakba nung nüburtem tebilemdangba melenshia odar.

PAP news agency-i, iba tebilemdangba ya melenshitsütsü asoshi kechi jenjang agitsüla ta asüngdangba mapang Rau-i, iba ya melenshitsü asoshi diplomatic jenjang nung kanga dang jenjang tulu agitsü nungdaker, ta ashi.

EU executive-i EU züngsem Bulgaria aser Romania na densema item linüktemi import dak sendakba nung tenokdangba agütsü aliba matsülangshitsü atema telemetba agiba sülen Slovakia, Poland aser Hungary-i, Ukraine nungi jangotsü bener aruba nokdangtsü telemetba agia liasü.

Item linüktem yagi ashiba agi, Ukraine nugi agricultural goods dalang bener aruba ajanga pei linük nung aluyimertem akoksar. Item jangotsütem ya timba anüoleni aser rongnendaki belener aotsü atema bener arur.

Canada nung Hokolbarnü jembiba mapang Zelenskyy-i Poland den mangatettep adoker aliba indang mesüok, ajisüaka Ukraine nem kodang teyari peria magütsüdir idangji Russia tali tashi itshidaktsü, ta ashi.

US-i Kyiv nem long-range ATACMS missile agütsütsü

Washington, Rongjui/September 23 (Agencies): Russia den raraba mapang Kyiv nem teyari agütsütsü atema Ukraine nem advanced long-range missiles agütsütsü US tir Joe Biden sentong lir.

Iba ken o jangja aliba ketdangsürtemi ashiba agi, Ukraine nem ATACMS missiles kar agütsütsü, koba range mile 190 (300km) lir.

Iba ajanga Kyiv nem front line adener Russia nungger amenoka aliba tesemtem amaktsü asoshi teyari agütsütsü.

Hokolbarnü Ukraine-i khaloktsüba missile kati Crimea nung Russia indang Black Sea fleet headquarters dak kongshio.

Ukraine military source kati ashiba agi, Sevastopol port ya Storm Shadow missiles amshia amak, koba Britain aser France-i agütsüba lir aser iba ajanga Kyiv atema anüolen aliba linüktemi agütsüba hadirtem koda tongtibang aji sayur.

Iba amala missile range ya mile 150 shi lir.

NBC News aser The Wall Street Journal sangdong balala ajanga ashiba agi, tir Biden-i Ukraine tir Volodymyr Zelensky dang parnok nem ATACMS (Army Tactical Missile System) missiles kar agütsütsü ta shiogo. Lenir ana ya Brehostibarnü White House nung ajurutepa liasü.

WSJ-isa, prangbong

injangtem ya taruba hoptatem nung yoktsü.

Kasa mapang nung ken o jangja alirtemi osang agütsüba sangdongba mapang Washington Post-i ashiba agi, Ukraine nem ATACMS den single warhead melena cluster bomblets agütsütsü.

America nung media-i iba osang agütsüba ya US mesüra Ukraine napronglai tang tashi nung officially jangjashija mali.

Biden aser Zelensky na sensaksemba sülen Washington-i USD million 325 alang military teyari agütsütsü ta sangdongogo, kong artillery aser injang densema lir. America indang Abrams tank tema taruba hopta Kyiv nem agütsütsü.

PELABA METETDAKTSÜR



Tsürabur asür **TEMSÜCHIBA LONGKUMER** (MOLUNGYIMSEN) Senso rongnungi tamputisang arishi küm 103 tashi Tsüngrem taochi nung wazüka anir arur 16th September 2023 aonung akümüli wadang temer teti alitsüba limai ogo. Tetemjen tebo ka ta shitettsüsa pa taküm liteter temenungratsüka, jangratemtsüka aser tenükshitsüka nüburtemi tushia iba akümüli toktsür ogo. Anungji pa akümüli mapang nungi asüba anogo tashi nung Yimten, Arogo, Kija Kibongtem, Lokti tentet palala aser Yimtsüng palala nungi nüburtem shirnokisa temeim sayua nübo, rongsen, shisatsü aser Sarasadem ajanga yaritepergo, nenok ajak dang kanga pelaba metetdaktsür. Tsüngremi nenok tali moajangma. **Temem: Chirnur, Semchirtem aser Kinungertem.**

Yimjung atema sensaksemtsü renema lir: Burhan



Khartoum, Rongjui/September 23 (Agencies): Sudan army tekolakbai ashiba agi, army anema nokdakba telok lenir den yimjung atema sensaksemtsü asoshi pa renema lir.

Gen Abdel Fattah al-Burhan-i ashiba agi, Rapid Support Forces (RSF) lenir Mohamed Hamdan Dagalo den mener sensak asemtsü atema pa renema lir.

Telok ana ya April ita nungi rara arudar aser iba rara nung nisung 5000 dak tema süogo, ta UN-i ashi. UN-isa rara ajanga nisung million pongu dak tema jenshia aoba metetdaktsüogo.

Gen Burhan, shibai 2021 küm sorkar atsünga liasü pa New York nung UN General Assembly nung o jembiba sülen BBC den interview ka agiba mapang iba olen ya lemsatepa liasü.

Sudanese Armed Forces (SAF) tekolakba yagi civilian ketdangsürtem nem tashi magüjaka pa lenisüba ya agizükdaktsütsü atema linük balala semdangba mapang ka lir.

Par sepaitemi civilian tem amaker ta ashiba ya Burhan-i magizük. UN aser teyari agütsüba lokti tentet balalai, nüburtem aliba tesem tayimtsü amshia amakba indang kuli lir ta shiaka pai iba taittsüba magizüki arudar.

Paisa parnoki takok angutsü ta temulung lema

bilemba lemsatep, ajisüaka pai pa indang headquarters Port Sudan-i belener aotsüsa kümogo, kechiyong linük yimtiba Khartoum nung raraba ajanga sorkar inyaksangshitsü tamakoktsü kümogo, ta ashi.

Gen Dagalo-i civilian tem kümzüka ayutsü ta nangzüker aliba sülen anidakdi süra pa den sensak asemtsü mulunga lir ta Gen Burhan-i ashi. Jeddah, Saudi Arabia nung May ita sensaksemba mapang telok anapronglai civilian tem kümzüka toktsütsü atema nangzüktepa liasü.

Iba hopta video osang ka ajanga Hemedti-ia sensaksemtsü mulunga aliba lemsatepogo.

General anapronglai taoba mapanga ceasefire atema sensaksemogo saka iba ajanga rara tajemba mekümdaktsü.

Sudan ya Somalia ama mesüra Libya ama lemdangtsü ta ashiba Gen Burhan-i magizüki liasü.

"Sudan melemdangi longjemer dang alitsü. Sudan ya state ka ama masetshitsü. Nenoki shisemba linük ama ozü linük nung matalokdaktsüner, Sudan nungertem ajak longjemer lir aser tang mangatettep adoker aliba ya yimjung nung mesüra rara ajanga tembangdaktsütsü," ta pai ashi.

UN-i ashiba agi, telok anapronglai kati danga rara akoktsü timla mali.

NSF Trophy: Asiipfü FA aser New Market FC nati takok angu



Kohima, Rongjui/September 23 (TYO): Angami Students' Union (ASU)-i ayongzüka Indira Gandhi Stadium Kohima nung tang asaya aliba 23buba NSF Martyr's Memorial Trophy 2023 nung Honibarnü Asiifü Football Academy, Manipur aser defending champions New Market FC nati takok tajung nguogo.

Honibarnü mezüngbuba asaya nung Asiipfü FA-i goal 2-0 agi Sechü FC madak takok ngua liasü.

Asaya nung Asiipfü FA atema Kigpin (14) aser P. Sorormi Thingsang (11) nati minute 42 aser 84buba nung goal kaka idakja liasü.

Iba asaya nung asayar yimya shitak mebenshiba atema Asüpfü FA nungi Woreithem Rain (4) nem yellow card agütsü aser kasa mapang nung Sechü FC nungi asayar Mhaphruovito Rhatsu nem red card agütsür asaya nungi tugudaktsü.

Asaya nung man of the match naroküm Lamgumlal Kigpen nem agüja liasü. Iba naroküm ya taoba mapang ASU executive züngsem Kevikhrietuo Dawhuo-i agüja liasü.

Honibarnü tanabuba asaya nung defending champions New Market FC-i goal 10-0 agi Ignite FC ayong ayonga kokogo.

Iba asaya nung Thejasetuo

Gwire (7) aser Neisede Peseyie (23) nati hat-trick idakja liasü. Gwire-i minute 7, 20, 27, aser 45buba nung goal pezü idaktsü aser Peseyie-i minute 14, 68 aser 69buba nung goal asem idaktsü. Maneni New Market atema Petevizo Kezeo-i (11) minute 36 aser 46buba nung goal ana idaktsü aser Khiuwangbo Kaurintah-ia (8) minute 6buba nung goal ka idakja liasü.

Taoba ASU tir Dievi Yano-i, Thejasetuo Peseyie nem man of the match naroküm agüja liasü.

September 25 nü asaya:

1. Sepfü FC vs Khuzama Youth Organisation @ 11:30 AM
2. F4C Academy vs Kigwema Students' Union @ 1:30 PM.

2buba Kohima District Futsal championship ayonger

Kohima, Rongjui/September 23 (TYO): Kohima District Football Association (K DFA)-i ayongzüka 2buba Kohima



District Futsal Championship October 6 aser 7 nü Niathu Sports Khikha nung asayatsü.

Taoba asayamung nung ama iba asayamung akokba team Nagaland Futsal Championship nung Kohima District team nungi asayatsü, koba October 17 nungi tenzüka asayatsü renema lir.

Asayamung nung takok angur nem senpet sen 30,000 agütsü aser tanabuba jenjang nung tembangba team nem senpet sen 20,000 agütsü. Asayamung nung shilem agitsü asoshi team shia taa 3,000 asütsü.


K DFA nung züngoksema aliba asayartem dang iba asayamung nung shilem agitsü

melatsü. K a s a m a p a n g n u n g K D F A - i ashiba agi, asayartem züngoksema tasembuba shilem a s a y a m u n g mapang lapoktsütsü aser asayamung asayaba tesem nunga tenüng züngoksemtettsü.

Asayartem atema registration form September 25 nü nungi tenzüka Flora Bakery, Aga Complex, High School nung angutsü.

Maneni asayamung atema form September 26 nü nungi tenzüka Global Sports, KK Angami Building; Sports Paradise, Rüluo Market, Kezieke; Start Sports, BOC; Sports World, Old Taxi Parking; Flora Bakery, High School & Hiemvü (Bakery), Bayavü Hill (Central Baptist Church Kohima anasa) nung angutsü.

Wang Xiyu-i Guangzhou WTA title benogo



Rongjui/September 23, 2023 (Agencies): China tsür Wang Xiyu-i Honibarnü Guangzhou Open koka la indang career nung mezüngbuba WTA Tour title ka benogo.

Final nung world number 88 asayar yagi 6-0, 6-2 agi Magda Linette kokogo, koba China nung 2019 küm sülen mezüngbuba WTA asayamung ka liasü.

Arishi küm 22 tain Wang-i iba asayamung akoba ya China tsürtem rongnungi Guangzhou nung asayamung akokba pezübuba liasü. Wang Qiang (2018), Zhang Shuai (2013, 2017) aser Li Na (2004) nungeri takok anguba sülen taküm lai iba asayamung kokogo.

"Asayamung akokba atema kanga pelar kechiyong asayar

ajak akoktsü tasak liasü. Ni asaya tenzüka mapang nungi asayamung ka koknua liasü. Iba ya kü nükjidong atalokba ka lir. Ni amanger tarutsü nung asayamung tuluba aser asaya tasaka agi ni ata alitsü aser iba hopta asayaba ama tajungtiba meranga asayatsü bilema lir," ta Wang-i ashi.

Taküm Wang densema China nung aser asemi tongtumbang asayamungtem nung takok ngutetogo. 2006 küm sülen tang mezüngbuba Zhu Lin (Hua Hin), Zheng Qinwen (Palermo) aser Wang nungeri asayamung kaka kokogo.

COVID-19 tashidak agi alima ajunga makmakshishi mesüdaktsü tsüingda China nung 2019 küm tatemsa WTA asayamung ka ayongzüka

asaya liasü.

Taoba mapang tarep asaya nung number one asayar Peng Shuai-i 2021 küm social media post ka ajanga taoba mapang China nung sorkar ketdangür kati la dak mebenshitsu yimya benshi ta ashiba sülen WTA-i China nung parnok asayamungtem ayongzüka masayatsü telemtetba agia liasü.

Iba sülen Peng ya mapa tatsüka samatok aser iba sülen lai shinga maitsü ta ashi aser iba ajanga la teküzmükba dak sendakba nung alima kintemi ola atoka liasü.

WTA-i China nung asayamung ayongzüka masayatsü atema telemtetba agi ya ajaki tenüngsanga agizük saka taküm April ita iba telemtetba ya melenshia liasü.

Pakistan team pre-World Cup sentong thingo

Rongjui/September 23, 2023 (Agencies): Pakistan tebur cricket team World masaya tsüingda Dubai nung oa telongjem mapa ka agitsü sentong liasü, ajisüaka taruba Hokolbarnü India-i aotsü atema visa menorang anguba ajanga iba sentong thiogo.

Pakistan team ya taruba hopta UAE-i aotsü sentong yanglur liasü, kong parnok Hyderabad-i oa New Zealand den September 29 nü mezüngbuba warm-up asaya masaya tsüingda anogo ishika mapang intoktsü terenemba liasü.

Ajisüaka iba sentong ya thiogo aser Pakistan team Karachi-i aotsü aser idak nungjiagi taruba hopta Hyderabad-i aotsü.

2012-13 season sülen Pakistan team-i tang mezüngbuba India semdangtsü lir.

Pakistan pur World Cup nung mezüngbuba asaya October 6 nü Rajiv Gandhi International Stadium, Hyderabad nung Netherlands den asayatsü.

Hokolbarnü Pakistan-i

World Cup atema asayar 15 agi kümtetba squad ka sangdongogo aser iba team ya Babar Azam lenisüba nung asayatsü. Tia maka team nung tongtumbang asayar Naseem Shah densema mali, shiba Asia Cup Super Four nung India den asayaba mapang yirua liasü.

Iba asaya nung Naseem Shah over tom ka nung ground toktsür aotsüsa aküm aser iba sülen pa asayamung nung shilem magitet.

Naseem melena team nung Hasan Ali züngoksemogo. Pakistan team nung fast bowler tem ya Shaheen Shah Afridi-i anir asayatsü aser pa nem Haris Rauf, Mohammed Waseem, aser Hasan Ali nungeri teyari agütsütsü.

World Cup atema Pakistan team:

Babar Azam (c), Shadab Khan, Fakhar Zaman, Imam-ul-Haq, Abdullah Shafique, Mohammad Rizwan, Saud Shakeel, Iftikhar Ahmed, Salman Ali Agha, Mohammad Nawaz, Usama Mir, Haris Rauf, Hasan Ali, Shaheen Afridi and Mohammad Wasim.

BILEMDANGANG
 "Tangari na sentoka metoktsütettsüsa tajung inyangang."